



蒔田

佷過年啊！係蒔田个好時務。滿仔位攏脛會著作穡人在煞田蒔禾。現代人較好命，做事逐件有機器好用。耕田請大輛个火犁來翻，蒔田用蒔田機來蒔、嘛請人射藥、落肥料，用割禾機割禾，逐件攏係機器化，自家伸顧禾得佷大即好，毋使拚硬頭、拚死拚活拚到半條命。

想起細漢个時，屋下若討蒔田，阿怙真早即愛準備。先留穀種，在紅泥缸浸穀種，等穀種暴芽个時，在田底閃燒个田頭整理出幾下股秧股好委穀種。拗穀種委到勻勻，用抹刀拗秧股抹平抹到金金金。接落來，用透明个塑膠布拗秧股做一下揜起來，按即毋驚會得鳥食去，嘛毋驚會凍著霜、寒著。

阿怙駛鐵牛紡田，田紡好得日頭炙。一來得泥鬮燥鬆，根好生長。二來，日夜溫差大，拗藏在泥底个蟲寒得佷死。立春過，即愛開始無閒，煞田蔭水，準備蒔田。田底个水得泥軟柔即好，傷多，秧子企毋會核，傷少，田泥傷丁秧子蒔毋會落。蒔田遐日，阿怙透早天盲光即落田去輪輪仔，拗一壟田畫出一大盤个棋盤。料秧子个人，用秧料拗秧子料做平大垵平大垵，園在秧籃內底，一緣一緣得佷順序。過一暍仔，換工个人嘛攏來啊！逐儕分工分到好勢好勢。擔秧子个人，打赤腳，肩頭擔著一擔个秧子行在遐滑溜溜个田塍面上，即像在練輕功，肩頭擔重，腳趾頭凍凍，一步步擔落田底。

蒔田師傅歸廬身个裝備，頭戴笠婆、手掛手扣、腳套腳扣，正手个手指公戴白鐵做個蒔田笏，腰結一條帶仔，拖一隻裝滿秧子个秧盆，一字排開，逐個相隔六行。這時務像在走相揜，逐個人倒手提著秧鉸，正手捏一撮秧子，隨蒔落田底棋盤个交叉點面上。一蕪一蕪蒔落去，倒手裡兩行、腳下頭前兩行、正手裡兩行慢慢蒔倒退。等過一暍即會用脛著田底點點个青。像係棋盤面上园淦淦个棋子。更加會體會著「退步原來是向前」个情景。

十點出啊，阿依即會擔著遐香噴噴个鹹糜到位田頭。自打早即認真做事个人，這暍子食肚嘛全然枵啊！歸鉢糜噴到淨淨。食飽後，後半場个比賽又開始啊。脛哪儕蒔較靚、蒔較緊。逐個人手攏無歇暍，點點人影創造千千萬萬個奇蹟。手底一比高低，即按一壟田在大家个打拚下成就遐靚靚个畫面。當晝時，田蒔好啊！阿依嘛在屋下準備好豐沛个一頓等大家。

作者：李秉璋

☆詞彙學習☆

【煞田】sad` teen`：開始耕田。

【射藥】sha` rhio：對農作物噴灑農藥。

【拚硬頭】biang` ngang teu`：做粗重的工作。

【閃燒】sham` shio`：避風而較暖和的。

【紡田】pang` teen`：用耕耘機耕田。

【輪仔】lien` a`：車輪式正條密植器。插秧用劃線器，再加三、四根木條於各小輪上，人持此器具倒退走即可畫出棋盤線。

【秧料】rhiong` leeu：形如大鍋鏟，專門用來鏟秧苗用的農具。

【手扣】shiu` keu`：袖套。用較粗布料製成袖子狀，套在手肘，用以保護。

【腳扣】gio` keu`：腿套。用較粗布料製成筒狀，套在小腿，用以保護。

【蒔田笏】shi` teen` gong`：用竹管或白鐵皮作成，前頭的部位呈斜尖刃形，套在大拇指上，專門用來分苗插秧的小農具。